

समे & 12:25 hrs.

<><><><><><>

### PM-Summit

प्रधानमंत्री नरेंद्र मोदी होरें आखेआ ऐ जे पूरी दुनिया अज्ज भारत गी इक भरोसेमंद ते जिम्मेदार भ्याल दे तौरा पर दिक्खारदी ऐ। कल स'झां नमीं दिल्ली च इक निजी मीडिया चैनल आसेआ लोआए गेदे विश्व शिखर सम्मेलन च बोलदे होई प्रधानमंत्री होरें आखेआ जे इलेक्ट्रानिक्स थमां लेइयै फार्मास्यूटिकल्स तगर ते गड्डियें दे निर्माण थमां लेइयै मोबाइल बनाने तगर भारत च निवेश दी इक लैहर द्रौड़ा करदी ऐ। उ'नें आखेआ जे एह निवेश, भारत गी आलमी सतह पर आपूर्ति श्रृंखला दा इक बड्डा केंद्र बनाने च मदद करा'रदे न। उ'नें गलाया जे अज्ज भारत दा विकास, वैश्विक मौकें गी नमां रूप देआ'रदा ऐ। प्रधानमंत्री होरें हाल च होए दे यूरोपी मुक्त बपार समझौते दा बी जिक्र कीता जेह्दे तैह्त्त यूरोपी मुलखें, भारत च 100 अरब डालरें दे निवेश दी प्रतिबद्धता व्यक्त कीती ऐ। उ'नें आखेआ जे एह्दे कन्नै बड्डे पैमाने पर रोजगार दे मौके उपलब्ध होऊन।

<><><><><><>

### LG-Buddha Relic

लेफ्टिनेंट गवर्नर मनोज सिन्हा होरें भारत थमां रूस दे एलिस्टा कलमाइकिया च बौद्ध धर्म दे सबनें शा मुख्ख मठ च रक्खे गेदे भगवान बुद्ध हुं'दे अवशेषें गी अज्ज नमन कीता। इस मौके उपपर एलजी होरें आखेआ जे ओहू भगवान बुद्ध होरें'गी प्रार्थना करदे न जे ओहू सबनें गी शीवादि देन ते लोकें बश्कार आध्यात्मिक रिश्ते गी होर मजबूती देन। श्री सिन्हा हुं'दा एहू दौरा भारत ते रूस बश्कार बडे महत्वपूर्ण सांस्कृतिक ते आध्यात्मिक सरबन्धें गी बी दर्शादा ऐ।

<><><><><><>

### CM-Bypolls

मुख्यमंत्री ओमर अब्दुल्ला होरें आखेआ ऐ जे नेशनल कांफ्रेंस बडगाम विधानसभा हल्के पर चुनांऽ लड़ग जिसले के नगरौटा सीट पर पार्टी, कांग्रेस दे मेदवार गी समर्थन देने लेई तैयार ऐ जेगर उं'दा आला कमान एहदी इजाजत दिंदा ऐ तां। मुख्यमंत्री होरें एहू गल्ल कल अनंतनाग च पत्रकारें आसेआ पुच्छे गेदे सोआलें दा परता दिं'दे होई आखी। ओमर होरें आखेआ जे मेदवारें दे नाएं दी घोशणा करने लेई अजे बी सुद्दा समाऽ पेदा ऐ। उ'नें दस्सेआ जे एन.सी बडगाम सीट पर ते चुनांऽ लड़ग गै पर नगरौटा सीट लेई कांग्रेस गी आखी दित्ता गेआ ऐ कि जेगर ओहू अपना मेदवार खड़ा करना चांह्दे न तां करी सकदे न, एनसी उसी समर्थन देग ते ओहदी जित्त लेई खुल्ले आम कम्म बी करग।

<><><><><><>

## Speaker-Media Interaction

जम्मू-कश्मीर विधानसभा दे स्पीकर अब्दुल रहीम राथर होरें कल असेंबली सचिवालय श्रीनगर च बक्ख-बक्ख समाचार संगठन दे नुमाइंदे कन्नै गल्लबात कीती ते उंदे कन्नै औंदे विधानसभा सत्र दी मीडिया कवरेज सरबंधी बक्ख-बक्ख पैहलुएं पर गल्लबात कीती। स्पीकर होरें मीडिया कर्मिं लेई सुविधाएं-बवस्थाएं दे बारै च बी तप्सीली गल्ल कीती तांजे उ'नेंगी कम्म करने लेई बवस्था आहले ढंगै सिर साजगार म्हौल उपलब्ध होई सकै। बैठक दुरान मीडिया आहलें दी बिजन दिक्कत परेशानी दे आओजाई ते होरनें सुविधाएं बारै बी गल्लबात होई। स्पीकर होरें आखेआ जे विधानसभा दी कार्रवाई गी लोकें तगर पुजाने च मीडिया दी भूमिका मती महत्वै आहली होंदी ऐ ते मीडिया गी इस गल्लै दा ध्यान रक्खना लोड़चदा जे सरकार दे कम्म ते इजलास दुरान होने आहले सबनें कम्म कारवाइएं गी पारदर्शी ढंगै सिर मीडिया च रक्खेआ जा तांजे जनता इस सब दे बारै च जागरूक होई सकै।

<><><><><><>

## Bandipora Best Performer

जम्मू-कश्मीर लेई बड़े मानै आहली गल्ल ऐ जे बांडीपोरा जिले नै आदि कर्मयोगी अभियान दे तैहत मुख्य भरै च सबनें शा बधिया प्रदर्शन करने आहले जिले दा खताब अपने नांऽ कीता ऐ। बांडीपोरा जिले ने बड़ी मती प्रतिश्ठा आहले आदि-कर्मयोगी अभियान दी बेमिसाल अमलावरी ते जमीनी सतह पर एहदे प्रभाऽ गी बड़े शानदार तरीके'नै उजागर कीता ऐ। इस शानदार उपलब्धि लेई बांडीपोरा दियें डिप्टी कमिशनर इंदु कंवल चिब होरें'गी कल लोआए गेदे राश्ट्री सतह दे इक समारोह दुरान राश्ट्रपति द्रौपदी मुर्मू होरें सम्मानित कीता।

<><><><><><>

## Dhanteras Festival

देश भरै च अज्ज धनतेरस दा त्योहार मनाया जा'रदा ऐ। अज्जै थमां देआली दे उत्सवें दी शुरुआत बी होई जंदी ऐ, जिंदे च नरक चतुर्दशी, देआली, गोवर्धन पूजा ते टिके दा ध्यार शामिल ना। धनतेरस गी धन त्रयोदशी ते धन्वंतरि जयंती दे नांऽ कन्नै बी जानेआ जंदा ऐ। इस शुभ ध्याड़े पर, लोक भगवान धन्वंतरि, भगवान कुबेर ते देवी लक्ष्मी हुं'दी पूजा करदे न ते सुन्ने जां चांदी दिआं चीजां ते नमें भांडे खरीदा बी शुभ मन्नदे न। प्रधानमंत्री नरेन्द्र मोदी, गृह मंत्री अमित शाह, केन्द्री राज्यमंत्री डाक्टर जीतेन्द्र सिंह ते लेफ्टिनेंट गवर्नर मनोज सिन्हा होरें बी लोकें गी अज्ज धनतेरस दे मौके उपपर मुबारकबाद दिती ऐ। श्री मोदी होरें सोशल मीडिया दी इक पोस्ट च सबनें दी खुशी, समृद्धि ते खरी सेहत दी कामना कीती ऐ। उ'नें मेद बुज्जी ऐ जे भगवान धन्वंतरि हुं'दा शीर्वाद सबनें बसनीकें उपपर बने दा रौहग। केन्द्री गृहमंत्री अमित शाह होरें बी इस मौके उपपर लोकें गी बधाई दिती ऐ ते उ'दी खरी सेहत, समृद्धि ते तरक्की दी कामना कीती ऐ।

<><><><><><>

## JMC-Diwali Muskan

जम्मू नगर-निगम नै Peace Initiative trust ते Govt. College of Education Canal road कन्नै रलियै मानसिक तौरा पर कमजोर बच्चें लेई इक देआली समारोह दा सरिस्ता कीता। इस कार्यक्रम दा आयोजन बच्चें गी खुश रखने, उंदा मनोरंजन करने दे कन्नोकन्नी समाजी जिम्मेदारी ते समुदायिक भावना दे मुल्लें गी बढ़ावा देने लेई कीता गेदा ह। जेएमसी कमिशनर डॉ. देवांश यादव इस मौके मुख परौहने हे। उत्सव दी शुरूआत रूख-बूहअे लाने दे अभियान कन्नै होई। ओहदे मगरा लक्ष्मी पूजन कीता गेआ।

<><><><><><>